

Քննքա՝ գաթա պատրաստում և ցանքի օրը կոտրում էին եզան գլխին և ուտում էին թե՛ ունչպարը, թե՛ հօտաղնէրը, որ բերքն առատ լինի, աշխարհը կըշտացնի¹⁴:

Սերմացանը սերմը ցրելուց առաջ երկար խաշ էր քաշում երեսը և ասում՝ «Տէր աստօծ, դու մինը հրգա՛ր ընէս»:

Երաշտի ժամանակ մատաղ էին մորթում. խեղդվածի գերեզմանի վրա ջուր էին ածում¹⁵ և այնտեղից բերած ջուրը արտում ցանում, կամ մի գօրավօր քար տեղից վերցնում, գետի կամ աղբյուրի մեջ լողացնում և բերում նորից տեղը դնում¹⁶: Այդպիսի խաշքարեր կամ պարզ գերեզմանաքարեր գյուղերից շատերի մոտ կային:

Ջուր էին ածում էջի գլխին: Սակայն ամենակտրուկ միջոցը համարվում էր գետ կամ առու երեք անգամ ալաթավ վարելը: Վեց կին լծվում էր եզնների փոխարեն ալաթի մեջ, մի կինն էլ ճիպօտը ձեռքին. քշում էր նրանց որպես հօտաղ, մի հասակավոր կին՝ փափախը տղամարդու պես գլխին դրած և առջևից շէրէփը առնանդամի տեղ կախ արած՝ բռնում էր մանը և ալաթի խօփը քարս զցած՝ երեք անգամ անց էր կացնում գետակի կամ առվակի երկարութեամբ ակոս ձգելով և ամեն տեսակ բացականչութուններով, «յէզնէրին» հայհոյելով և աղմկելով, ներկայացնում էր իբր թե դժվար վար է¹⁷:

Երկարատև անձրևներից ցանքսը պաշտպանելու համար նույն քարերի վրա կրակ էին վառում, կամ առջնեկ երեխայի ետույթը բացում՝ անձրևին ցույց տալիս կամ ձօլի էին շինում:

Մի երկար շերեփին մի այլ ավելի կարճ շերեփի խաշած և կապած՝ աղջիկները հագնում էին կնոջ ձեռով, ձօլի տիկնիկ շինում և պէպէ՛զ՝ ոտաբոբիկ շրջեցնում էին այդ ձօլին պարելով անետուն և երգում¹⁸:

Ձօլի, ձօլի, էս ձօլի,
Մարդը մէռած էս ձօլի,
Տղան մէռած էս ձօլի:

Ձօլին ընկավ ծովը....
Ծովիցը հանօղ չը կա,
Սիջիմ¹⁹ պէրէ՛ք, տո՛ւ օնէք,

¹⁴ Ողջի (Օխի):

¹⁵ Օրինակ՝ Բեխի Սուրբ Արիտակէս անապատի ճանապարհին:

¹⁶ Օրինակ՝ Տաթև գյուղում Պետրոսախաչը: Տաթևում «անձրև առաջացնելու համար դիմում են և այս միջոցին: Կիրակի առավոտ, երաշտի ժամանակ աղջիկները ման են գալիս տնետուն, հավաքում են զանազան ուտելիղեն և հետները տանում մի սարի գլուխ, որտեղ ընդհանուր ճաշ են սարքում, երգում, ուտում, խմում, զվարճանում: Այդ սարից ճաշից հետո վերցնում են մի քար և տանում են մոտակա վտակը: Այդ ծիսակատարութեան ժամանակ աղջիկները չպիտի ետ նային: Քարը ձգում են ջրի մեջ և նրա մեջ թողնում մի նկատելի տեղ, որ երբ արդեն հարկավոր չի լինի՝ տանեն ետ, դնեն հին տեղը, թե չէ սաստիկ անձրևը կարող է սրբել՝ տանել բոլոր ցանքսերը»: СМОМПК, ВЫП. XIII, ОТД. 1, էջ 115:

¹⁷ Վերջին անգամ այսպիսի գետ վարելու դեպքը տեղի է ունեցել պառավների մասնակցութեամբ Լոր գյուղում սովետական կարգերի հաստատվելուց հետո առաջին տարիներին:

¹⁸ Արծվանիկ:

¹⁹ Այժի մազից պատրաստած երկար պարան: